

四庫全書

子部

欽定四庫全書

歲時雜詠卷四十

宋 蒲積中 編

冬至

冬至日贈安節

蘇軾

我生幾冬至少小如昨日當時事父兄上壽拜悅膝十年閒凋謝白髮催衰疾瞻前惟兄三顧後子由一近者隔江濤遠者天一壁今朝復何幸見此萬里姪憶汝總角時啼笑為梨栗

陶潛詩通子垂九齡但覓梨與栗

今來能慷慨志氣

堅鐵石諸孫行復爾世事何時畢詩成却超然老淚不成滴

和過子冬至與諸生飲酒

小酒生黎法乾糟瓦盎中芳辛知有毒滴瀝取無窮凍醴寒初泣春醅暖更濛華夷更樽合醉笑一歡同里閭
我山北田園震澤東歸期那敢說安信不曾通鶴髮驚
全白犀圍尚半紅愁顏解符老壽耳鬬吳翁得穀鵝初
飽亡貓鼠益豐黃姜收土芋蒼耳斫霜叢兒瘦綠諸藥

奴肥爲種松頻頻非竊食數數尚乘風河伯休夸若靈
昌自舞馮歸途陷泥淖炬火燎茅蓬膝上王文度家傳
張長公和詩仍醉墨戲海亂羣鴻

冬至日獨遊吉祥寺

井底微陽回未回蕭蕭寒雨濕枯荻何人更似蘇夫子
不是花時肯獨來

次韻仇池冬至日見寄

蘓轍

身如草木順陰陽附火重裘百日強漸喜微和解凝烈

半酣起舞意倉忙吾兄去我行三臘千里今宵共一觴
世事只令人自解苦寒須盡酒如湯

進賀冬至

張無盡

燭滿天街曉漏長杜門牢落歎臺綱金吾六卒閒私第
玉笋千官守未央五貴訐謨除盜賊一朝新事効風霜
堯天咫尺橫雲霧遙慶南山萬壽觴

冬至

梅堯臣

銜泣想慈顏感物哀不平自古九泉死靡隨新陽生稟

命異草木彼將羨勾萌人實嗣其世一衰復一榮

依韻和吳正仲冬至

流光冉冉即衰遲物趣回環似轉規長景已知今日至
孤懷不比少年時阻陪上閣鴛鴦後且與南州父老期
況有春禾新酒熟百分休放手巾中卮

冬至日得謝師厚宋次道中道書

水國欲爲雪野冰將合河人同一陽至淚向十行多朋
意今猶在年華悵已過看看四十九應笑此蹉跎

宣城至日謁天慶觀呈郡僚 張耒

溪山慘殘歲况乃值新冬凌晨率其屬肆禮款琳宮漠
漠冒原霧淒淒隔水風南方異氣候霜葉未全紅忽憶
簪史筆且趣闢蒼龍拜舞上東閣佳氣鬱葱葱談笑出
右掖交游盡英雄老大心已矣依然夢魂中

冬至後 三首

寒着添綿衲朝燒折足鐺何勞問榮辱便足了平生理
自陰陽運吾寧口舌爭深居玩吾寶不遣世人驚

水國過冬至風光春已生梅如相見喜鴈有欲歸聲老
去書全嬾園中酒屢傾窮通付吾道不復問君平
梅柳有情態江鄉逼歲除山村見霜橘江市出寒魚謫
久衣冠懶身閒故舊踈傍籬挑菜甲憶我故園蔬

至後早赴館

紅臘粧梅冷未粘柳條偷暖乍纖纖高樓殘月誰家雪
盡日天寒不卷簾

冬至二絕呈阿璉念六

荻籬茅屋柯山下賣餅歸來也
做冬不見長安競時節
車如流水馬如龍

五更人起語江城笑語喧
喧天欲明酌酒壽君但一醉
百年珍重是人情

冬至

紫壇曾從莫琳琅親被天人玉
晃光今日黃州山下寺

五更聞鴈滿林霜

余元祐七年南郊曾與捧冊在泉池祇席左見上晃玉替白如雪爲燭所

照光
數尺

和至日北園讌集

晏殊

清曉融風肅桂堂郡僚多暇舞筵張

是日太
守命賓

臺高已驗

雲容媚日暖懸知刻漏長溪子弩寒千

闕

命蘭英酒熟

闕傳觴官曹事集神都近預拜需函慶一陽

奉和聖製冬至

吉序冠三正民時協順成歲穰千畝實氣爽六符平肆
樂遵年律迎長藹頌聲雲濃燕鴈度雪霽楚蘭榮異域
梯航集諸侯篚貢盈堯仁敷萬有同此一陽生

冬至夜發峽州舟中作

范成大

舟中萬里行燈下一陽生不減在家好都忘爲旅情霜
乾風愈勁雲淡月微明況有詩兼酒樽前莫問更

冬至

王安石

都城開博路佳節一陽生喜見兒童色歡傳市井聲幽
閒亦聚集珍麗各攜擎却憶他年事闕商閉不行

長至二首

石敏若

陽和散逐管灰浮節物那知人倦遊無可奈何霜後冷

急推不去眼中愁
康衢結束新裳雜飛蓋
追隨賀客稠
猶有襴衡漫一刺
侯門如海未容投

筆墨如山寧療飢
謾勞紅日一絲遲
濁醪有理貧難醉
坐客無氈寒見欺
占歲豐凶雲物動
漏春消息管灰知
江南梅使無恙否
腸斷隴頭花一枝

冬至夜旅懷

楊萬里

亂霜如葉撲窗寒
愁到心如欲斷絃
鳳管陽纔一聲起
蟾輪月已九分圓
擁爐酌凍酒相對歌
枕背殘燈未眠

乞得曉鐘西拜望露中香爲祝親燃

長至日念應求

三十日

余安行

純陰歸盡一陽來鬱鬱襟懷此日開早晚天恩到巖峽
整裝應得趁時迴

和任普州冬至日作

李新

詩成椽筆一何工元有英聲妙洛中已是少師扶日手
更看公子釣鰲風書雲寶策開新瑞脫木香山墮晚紅
經濟通才猶補外與騎星鶴問圓穹

南至日過塩埧官亭

墮衣黃楓香着鬢青霜濕江山如故人到眼類長揖客
行先飛蓬不肯擬馬立時節當書雲相將何太急我本
芻牧兒家有舊蓑笠勤辛朱墨間銷減耕耨力欲歸倒
虛囊追赴村社集傳言東鄰翁但空西向席梨栗隨所
有大白更增一勿復問市朝與翁醉終日

冬至夜宿顓口市

寧辭舉棹頻不覺又黃昏有感逢冬節無聊宿水村客

心愁待旦盃酒強開樽共祝同歡慶亨途莫我論

歲時雜詠卷第四十

欽定四庫全書

歲時雜詠卷四十一

宋 蒲積中 編

除夜

歲盡應制

庾肩吾

歲序已去殫春心不自安
聊開百葉酒試奠五辛盤
金薄圖神驚朱泥却鬼丸
梅花應可折惜為雪中看

歲窮應教

薛道衡

故年隨夜盡初春逐曉生
方驗從軍樂飲至入西京

守歲

唐太宗

暮景斜芳殿年華麗綺宮寒辭去冬雪暖帶入春風階
馥舒梅素盤花卷燭紅共歡新故歲迎送一宵中

太原召侍臣賜宴守歲

四時動灰琯一夕變冬春送寒餘雪盡迎歲早梅新

守歲

歲陰窮暮紀獻節啓新芳冬盡今宵促年開明日長冰
銷出鏡水梅散入風香對此歡終宴傾壺待曙光

同前

唐高宗

今朝冬律盡來朝麗景新
花餘凝地雪條含暖吹分綬
吐牙猶嫩冰臺已鏤津
薄紅梅色冷淺綠柳輕春
送迎交兩節暄寒變一辰

奉和守歲應制

許敬宗

玉琯移玄序金奏賞彤闈
祥鸞歌裏轉春燕舞前歸
壽爵傳三禮燈枝麗九微
運廣薰風積恩深湛露晞
送寒終此夜延宴待晨暉

西京守歲

駱賓王

閒居寡言宴獨坐倦風塵忽見嚴冬盡方知列宿春夜
將寒色去年共曉光新耿耿他鄉夕無由展舊親

歲夜安樂公主滿月侍宴

沈佺期

除夜子星迴天孫滿月盃詠歌麟趾合簫管鳳雛來歲
炬常燃桂春盤預折梅聖皇千萬壽垂曉御樓開

守歲應制

南渡輕冰解渭橋東方樹色起招搖天子迎春取今夜

王公獻壽用明朝殿上燈人爭烈火宮中佞子亂驅妖
宜將歲酒調神藥聖祚千春萬國朝

守歲侍宴應制

杜審言

季冬除夜接新年帝子王臣捧御筵宮闕星河低拂樹
殿庭燈燭上薰天彈琴奏管梅風入對局探鉤栢酒傳
欲向元正歌萬壽暫留歡賞寄春前

除夜有懷

故節當歌守新年把燭迎冬氛戀虬箭春色候雞鳴興

盡聞壺覆宵闌見斗橫還將萬億壽更謁九重城

歲夜安樂公主滿月侍宴應制

歲畢生昌胤天杯宴重臣畫樓初滿月香殿早迎春
睿作堯君寶孫謀梁國珍明朝元會日萬壽樂章陳

欽州守歲

張說

故歲今宵盡新年明日來愁心隨斗柄東北望春迴

岳州守歲

三首

除夜清樽滿寒庭燎火多舞衣連臂拂醉坐合聲歌至

樂都忘我冥心自委和此年今已度來歲知如何

夜風吹醉舞庭火對酣歌愁逐前年去歡迎今歲多
桃符堪辟惡竹爆妙驚眠歌舞留今夜猶言惜舊年

除夜作

高適

旅館寒燈獨不眠客心何事轉悽然故鄉今夜思千里
霜鬢明朝又一年

歲除夜樂城張少府宅作

二首

孟浩然

雲海訪甌閩風濤泊島濱何知歲除夜得見故鄉親予

是乘桴客君為失路人平生復能幾一別十餘春
疇昔通家好相思無間然續明催畫燭守歲接長筵舊
曲梅生唱新正栢酒傳客行隨處樂不覺度年年

歲除夜有懷

五更鐘鼓欲相催四氣推遷往復迴帳裏殘燈猶有燭
爐中香氣盡成灰漸看春逼芙蓉枕頓覺寒銷竹葉杯
守歲家家看不卧相思那得夢魂來

除夜樂城逢孟浩然

張子容

遠客襄陽郡來過海畔家
樽開栢葉酒燈發九枝花
妙曲逢廬女高才得孟家
東山行樂意非是競豪華

除日

臘月今朝晦流年此夕除
拾樵供歲火帖牖作春書
柳覺東風至花疑小雪餘
忽逢雙鯉贈言是上冰魚

杜位宅守歲

杜甫

守歲阿咸家椒盤已頌花
盞簪喧櫪馬列炬散林鴉
四十明朝過飛騰暮景斜
誰能更拘束爛醉是生涯

除日

韋應物

思懷耿如昨
季月已云暮
忽驚年復新
獨恨人成故
冰池始泮綠
梅園還飄素
淑景方轉延
朝朝自難度

除夜宿石橋館

戴叔倫

旅館誰相問
寒燈獨可親
一年將盡夜
萬里未歸人
寥落悲前事
支離笑此身
愁顏與衰鬢
明日又逢春

歲除日奉推事使牒赴撫州辨對留別崔法曹

陸大祝處士上人同賦人字口號

上國杳未到流年忽復新迴車不自識君定送何人

建中癸亥歲奉天除夜宿武當山北茅平村

歲除日又暮山險路仍新驅傳迷深谷瞻星記北辰古
亭聊假寐中夜忽逢人相問皆嗚咽傷心不待春

歲夜雪中喜魏萬成郭厦相尋

劉長卿

新年欲變柳舊客共沾衣旅夜猶難盡鄉春又獨歸寒
燈映虛牖暮雪掩閒扉旦暮乘船去平生相訪稀

嶺外守歲

李福業

冬去更籌盡春隨斗柄回
寒暄一夜隔客鬢兩年催

除夜書情

周弘亮

何處風塵歲雲陽古驛前三冬不再夜
曉日又明年春入江南柳寒歸塞北天
還傷知候客花景對韋編

故鄉除夜

三百六十日已終故鄉還與異鄉同
非惟律變情堪恨抑亦才疎運未通
何處夜歌銷臘酒誰家高燭候春風

詩成始欲吟將看早是去年牽課中

除夜長安客舍

歐陽詹

十上書仍寢如流歲又遷望家思獻壽算甲恨增年虛
牖傳寒杙孤燈照絕編誰應問窮轍泣盡更潸然

除夜侍酒呈諸兄示舍弟

莫歎明朝又一春相看堪共貴茲身悠悠寰宇同今夜
膝下傳杯有幾人

守歲

二首

盧仝

年去留不得年來也任他當爐一榼酒爭奈兩年何
老去經節臘樂事甚悠悠不及兒童日都廬不解愁

除夜二首

姚合

衰殘歸未遂寂寞此宵情舊國餘千里新年隔數更寒
猶近北峭風漸向東生誰見長安陌晨鐘動火城

殷勤惜此夜此夜在逡巡燭盡年還別雞鳴老更新儻
聲方去病酒色已迎春明日持杯處誰為最後人

除夜悼亡

元稹

憶昔歲除夜見君花燭前
今宵祝丈上重疊叙新年
閒處低聲哭空堂背月眠
傷心小男女撩亂火堆邊

除夜酬樂天

引儺綏旆亂毵毵戲罷人歸思
不堪虛漲火塵龜浦北
無由阿傘鳳城南休官期限原同約
除夜情懷老共諳
莫道明朝始添歲今年春在歲前三

除夜宿洺州

白居易

家寄關西住身為河北
遊蕭條歲除夜旅泊在洺州

除夜寄弟妹

感時思弟妹不寐百憂生
萬里經年別孤燈此夜情
病容非舊日歸思逼新正
早晚重歡會羈離各長成

客中守歲在柳家莊

守歲樽無酒思鄉淚滿巾
始知為客苦不及在家貧
畏老偏驚節防愁預惡春
故園今夜裏應念未歸人

除夜二首

薄晚支離坐中宵枕臂眠
一從身去國再見日周天
老

度江南歲春拋渭北田潯陽來早晚明日是三年
歲暮紛多思天涯渺未歸老添新甲子病減舊容輝鄉
國仍留念功名已息機明朝四十九應轉悟前非

和微之除夜作

君賦此詩夜窮陰歲之餘我和此詩日微和春之初老
知顏狀改病覺支體虛頭上毛髮短口中牙齒疎一落
老病界難逃生死墟況此促促世與君多索居君在浙
江東榮駕方伯與我在魏闕下謬乘大夫車妻兒常各

飽奴婢亦盈廬唯是利人事此君全不如我統千郎官
君領百吏胥我掌四曹局君管十鄉閭君為父母君大
惠在資儲我為刀筆吏小惡乃誅鋤君提七郡籍我按
三尺書俱已佩金印嘗同趨玉除外寵信非薄中懷何
不攄恩光未報答日月空居諸磊落嘗許君跼促應笑
予所以自知分欲先歌歸歟

除夜寄微之

鬢毛不覺日氍氍一事無成百不堪共惜盛時辭闕下

同嗟除夜在江南
家山泉石尋常憶
世路風波子細諳
老校於君合先退
明年半百又加三

除夜

病眼少眠非守歲
老心多感又臨春
火銷燈盡天明後
便是平頭六十人

歲除夜對酒

衰翁歲除夜對酒
思悠然草白經霜地
雲黃欲雪天
醉依香皆反香枕坐
慵傍暖爐眠
洛下閒來久
明朝是十年

三年除夜

晰晰燎火光氤氲臘酒香
嗤嗤童稚戲迢迢歲夜長
堂上書帳前長幼合成行
以我年最長次第來稱觴
七十期已近萬緣心已忘
不惟少歡樂兼亦無悲傷
素屏映居士青衣侍孟光
夫妻老相對各坐一繩床
顧虎頭畫維摩居士圖惟白衣素屏也

除夜書懷兼贈張常侍

三百六旬今夜盡六十四年明日催
不用歎聲隨日老

亦須知壽逐年來加添雪興憑氈帳消殺春愁付酒杯
唯恨詩成君去後紅牋紙卷共誰開

歲暮

窮陰急景暗相催壯齒韶顏去不迴舊病重因年老發
新愁多待夜長來膏明自熱緣多事鴈默先烹為不才
禍福細尋無會處不如且進手中盃

歲夜詠懷兼寄思黯

遍數故交親何人得六旬

與思黯夢得數侍還
淪沒者少過得六十

今年已

入手餘事豈關身老自無多興春應不揀人陶窗與弘
閣風景一時新

歲夜詠懷

劉禹錫

彌年不得意新歲又如何念昔同游者而今有幾多以
閒為自在將壽補蹉跎春色無情故幽居亦見過

樂天夢得有歲夜詩聊以奉和

牛僧孺

惜歲歲今盡少年應不知淒涼數流輩歡喜見孫兒暗

減渾身力潛添兩鬢絲
莫愁花笑老花自幾多時

奉和劉賓客二十八丈歲夜詠懷

盧貞

文翰走天下琴樽卧洛陽
貞元朝士盡新歲一悲涼
名早緣才大官遲為壽長
時來知病已莫歎步趨妨

除夜

今歲今宵盡明年明日催
寒隨一夜去春逐五更來
氣色空中改容顏暗裏迴
風光人不覺已著一作後園梅

除夜長安作

李京

長安朔風起窮巷掩雙扉
新歲明朝是故鄉何路歸
鬢絲饒鏡色隙雪奪燈輝
却羨秦州鴈逢春盡北飛

鄂渚除夜書懷

來鵬

鸚鵡洲頭夜泊船此時形影共淒然
難歸故國干戈後欲告何人雨雪天
筋撥冷灰書悶字枕陪寒席帶愁眠
自嗟落拓無成事明日春風又一年

酬劉谷除夜見寄

李郢

坐恐三更至流年此夜分客心無限事愁雨不堪聞
上家殊遠爐前酒暫曛劉郎亦多恨詩憶故山園

隋宮守歲

李商隱

消息東郊木帝迴宮中行樂有新梅沉香甲煎爲庭燎
玉液瓊蘇作壽盃遙望露盤疑是月遠聞鼙鼓欲驚雷
昭陽第一傾城客不踏金蓮不肯來

酬李紱歲除送酒

雍陶

歲盡貧心事事湏就中深恨酒錢無故人克壽能分送

遠客消愁免自沽一夜四乘傾鑿落五更三點把屠蘇
已供時節深珍重況許今朝更挈壺

共佳人守歲

劉綺莊

桂華窮北陸荆艷下東隣殘粧欲送曉薄衣已迎春舉
袖爭流雪分歌競繞塵不應將共醉年去遠催人

巴山道中除夜書懷

崔塗

迢遞三巴路羈危萬里身亂山殘雪夜孤燭異鄉春漸
與骨肉遠轉於僮僕親那堪正漂泊明日歲華新

途中除夜

高蟾

南北游萍跡年華又暗催
殘燈和臘盡曉角帶春來
鬢欲漸侵雪心仍未肯
灰金門舊知己誰為脫塵埃

除夜作

薛能

和吹度穹旻虛徐接建寅
不辭加一歲唯喜到三春
燎照雲烟好幡懸井邑新
禎祥應北極調燮驗平津
樹欲含遲日山將退舊塵
蘭茝殘此夜竹爆和諸鄰
祝壽思明聖驅讎看鬼神
團圓多少輩眠寢獨勞人
茜旆猶雙

節雕盤又五辛何當平賊後歸作自由身

和曹侍御除夜有懷

有病無媒客多慵亦太踈自憐成叔夜誰與薦相如嗜
退思年老諳空笑歲除跡閒過寺宿頭煖近階梳春立
窮冬後陽生舊物初葉多庭不掃根在逕新鋤田事終
歸彼心情老倦於斲材須見像藏劍豈為魚効淺慙尸
祿恩多負辟書酬知必擬共勿使浪躊躇

除夜

舊歷不足卷東風還坐聞一宵猶幾刻兩歲欲平分臘
盡傾時斗春通綻處雲明朝遙捧酒先合祝吾君

江外除夜

千門庭燎照樓臺總為年光急急催半夜臘因風卷去
五更春被角吹來寧無好鳥思花發應有游魚待凍開
不是多岐漸平穩誰能呼酒祝昭回

旅舍除夜

皮日休

永夜誰能守羈心不放眠挑燈猶故歲總角已新年出

谷空嗟晚銜
盃尚愧先來朝
辭逆旅雪涕野槐天

除夜

方干

五更斯須即達晨
四時吹轉任風輪
寒燈短燭方燒臘
畫角殘聲已報春
來日便為經歲客
昨朝猶是去年人
新正定數隨年減
浮世應難百遍新

歲盡日 二首

司空圖

莫話傷心事
投春滿鬢霜
殷勤共樽酒
今歲只殘陽
明日添一歲
端憂奈爾何
衝寒出洞口
猶較夕陽多

歲除夜對王秀作

韋莊

我惜今宵促君愁玉漏頻豈知新歲酒猶作異鄉身雪
向寅前凍花從子後春到明追此會俱是隔年人

除夜

羅隱

官歷行將盡村醪強自傾厭寒思暖律畏老惜殘更歲
月已如此冠戎猶未平兒童不諳事歌吹待天明

歲時雜詠卷第四十一

欽定四庫全書

歲時雜詠卷四十二

宋 蒲積中 編

除夜

和子由除日

蘇軾

薄官

一作官

驅我西遠別不容惜方愁後會遠未暇憂歲

夕強歡須有酒冷酌不成席秦烹惟羊羹隴饌有熊腊
念為兒童歲屈指已成昔往事今何追忽若箭已釋感
時嗟事變所得不償失府卒未驅讎矍鑠驚遠客愁來

豈有悵玉藥何時析不憂春艷晚行見棄皮核人生行
樂爾安用聲籍籍胡為獨多感石火膏自炙詩來若相
寬子意遠相射依依見其面疑子在咫尺兄今雖小官
幸忝佐方伯北地近所鑿中有硯水碧臨池飲美酒尚
可消永日但恐詩力弱鬪健未免馘詩成十日到誰謂
千日隔一日寄一篇憂愁何足擲

除夜病中呈喬太博

龍鍾三十九勞生已強半歲暮日斜時還為昔人歎

樂天

詩云行年三十
九歲暮日斜時
今年一線在那復堪把玩欲起強持酒

故交雲雨散惟有病相尋空齋為老伴蕭條燈火冷寒
夜何時旦勸僕觸屏風飢飈嗅空案數朝閉閣卧霜髮
秋蓬亂傳聞使者來策杖就梳盥書來苦安慰不怪造
請緩大夫忠烈後高義金石貫要當擊權豪未肯覩衰
懦此生何所似暗盡灰中炭歸田計已決此邦聊假館
三徑粗成資一枝有餘暖願君更信宿庶奉一笑粲

除夜大雪留維州元日早晴遂行中途雪後復

作

除夜雪相留元日晴相送東風吹宿酒瘦馬兀殘夢
曉光開旋轉餘花弄下馬成野酌佳哉誰與共須臾
曉雲合亂洒無缺空鵝毛垂馬鬣自怪騎白鳳三年東
方旱逃戶連歎棟老農釋耒歎淚入飢腸痛春雪誰云
晚春麥猶可種敢怨行役勞助爾歌飯甕

守歲

欲知垂盡歲有似赴壑蛇修鱗半已沒去意誰能遮况

欲繫其尾雖勤知奈何
兒童強不睡相守夜謹譁晨雞
且勿唱更鼓畏添過坐久燈燼落
起看北斗斜明年豈
無年心事恐蹉跎
努力盡今夕少年猶可誇

除夜過吳江

東南勝處未忘情
老去扁舟復此行
小邑歲除無市井
下田水落見農耕
雪消西嶺嶒嶠出
春到平湖鱗甲生
橋下雙蛟耽睡美
欲撻千鼓作雷鳴

除夜野宿常州城外

二首

行歌野哭兩堪悲，遠火低星漸向微。
病眼不眠非守歲，鄉音無伴苦思歸。
重衾脚冷知霜重，新沐頭輕感髮稀。
多謝殘燈不嫌客，孤舟一夜許相依。

南來三見歲云徂，直恐終身走道塗。
老去怕看新曆日，退歸擬學舊桃符。
烟花已作青春意，霜雪偏尋病客鬚。
但把窮愁博長健，不辭最後飲屠蘇。

僕年三十九在潤州道上過除夜作此詩又二

十年在惠州錄之以付過

二首

寺官官小未朝參紅日半窗春睡酣爲報鄰雞莫驚覺
更容殘夢到江南

釣艇歸時菖葉雨縹車鳴處棟花風長江昔日經遊地
盡在如今夢寐中

除夜訪子野食燒芋戲作山人謂李泌也

松風溜溜作春寒伴我飢腸響夜闌牛糞火中燒芋子
山人更喫懶殘殘

除日寄仇池

以蘇轍

一歲不復居一日安足惜人心畏增年對酒語終夕夜
長書室幽燈燭明照席盃盤雜梁楚羊炙渾魚腊庖人
饌雞兔家一作佳味宛如昔有懷岐山下展轉不能釋念

同去閭里此節三已失初來寄荆渚魚鴈賤宜客楚人
重歲時爆竹鳴礫礫新春始涉邱田凍未生麥相攜歷
唐許花柳漸芽圻居梁不奈貧投杞避糠覈城南庠齋
靜終歲守墳籍酒酸未嘗飲牛羹每共炙謂言從明年
此會可懸射同爲洛中吏相去不盈尺濁醪幸分季新

笋可餉伯嶢嶢嵩山美漾漾洛水碧官閒得相從春野
玩朝日安知書閣下羣子並遭馘偶成一朝榮遂使千
里隔何年相會歡逢節勿輕擲

益昌除夕感懷

永漏侵春已數籌地爐猶擁木綿裘無心豈畏三尸訴
愛日還驚一歲休故國二千空醉眼新年三十恰平頭
光陰未用相敦迫領取衰翁兩鬢秋

醉宿定國東齋

歲曉城東故相家夜聽簾外落瓊花醉眠東閣銀缸暗
起視中庭風竹斜魯酒近來無奈薄秦聲別後苦聞誇
思君勸對南湖飲歸去紛如日暮鴉

除夕

患難思年改龍鍾惜歲徂關河先壠遠天地小臣孤
吾道憑溫酒時情付擁爐南荒足妖怪此日謾桃符

次韻蜀公丙辰除夜

數舉除夜酒稍消年少豪浮光寄流水妙理付濁醪微

陽未出土大雪飛鵝毛試問冰霜勁春來能久牢

次東坡守歲韻

於菟絕繩去顧兔追龍蛇奔走十二年羅網不及遮嗟
我地上人豈復奈爾何未去不自閒將去迺喧譁天上
驅獸官爲君豈停撾魯陽揮兵戈日車果再斜灑酒勸
爾醉期爾暫蹉跎偕醉遣爾去壽考自足誇

和子淵除夜

司馬光

緹室重飛玉琯灰物華全與斗杓回依依殘臘無情別

歷歷新春滿眼來強取酒卮浮翠栢懶開棕葉覓楊梅
男兒努力平生志肯使功名落草萊

除日寄舍弟

王安石

一樽聊有天涯憶百感翻然醉裏眠酒醒燈前猶是客
夢回江北已經年佳時流落真何德勝事蹉跎只可憐
惟有到家寒食在春風因泛瀕溪船

除日

爆竹聲中一歲除春風送暖入屠蘇千門萬戶曈曈日

總把新桃換舊符

歲除

宋 祁

佳節真如借良宵此向闌家儲宿歲酒鄉送大讎寒舊
卉回新物來情續去歡忽忽餘幾刻催具五辛盤

守歲

已覺新杓動猶聞促漏餘夜寒窮臘尾春色併年初事
往成追計身羈況索居明朝為壽酒無奈故人踈

除夜二首

一杯芳酒夜分天萬慮勞勞耿不眠明日新春到何處
菱花影裏二毛邊

厯尾無餘日更籌促曙躔持愁勝殘歲將老入新年

除夕與家人飲

梅堯臣

莫嫌寒漏盡春色來應早風開玉砌梅薰歇金爐草稚
齒喜成人白頭嗟更老年華箇裏催清鏡寧長好

和歲除日

一年三萬六千刻玉漏唯餘十二時去日苦多誰會惜

殘陰全少頗能知已驚顏貌徐徐改不奈烏蟾冉冉馳
萬國明朝賀新歲東風依舊入春旗

除夜雪

擊鼓人驅鬼漫天雪送寒臘從今日盡花作舊年看著
樹多還墮隨風積更乾明朝預王會畏濕兩梁冠

除夜

七十已強半所餘能幾何懸知暮景促更覺後生多遁
世名為累留年睡作魔西歸端着便老子不婆娑

除夜對酒贈少章

歲晚身何託，燈前客未空。
半生憂患裏，一夢有無中。
髮短愁催白，顏衰酒借紅。
我歌君起舞，潦倒略相同。

次韻晁無斁除日述懷

世學違從衆，名家最近天。
感時猶壯志，得句起衰年。
衰酒無何飲，陶琴不具弦。
平生揮翰手，幾見絕韋編。

奉和聖製除夜

二首

晏殊

秘掖楯軒嚴萬戶，慶宵躔次會三辰。
丹闌肅穆猶凝夕，

佳氣蔥蘢漸報春調厯自將穹厚永聖辭常與歲時新
送寒旁磔迎和令率土羣生仰昊旻

珠躔回碧落絳燎燭青規瑣闥瓊籤度層臺玉漏移納
新皇澤普順節聖情怡萬宇長安陌鄉讎集此時

和三兄除夜

星漢回層宇墁簏集上都夜寒凝爆燎春氣入屠蘇九
陌傳珂乘千門促漏壺此時開棣宴仍在碧城隅

次韻和致仕陳相公除夜

從來歲除詠託諷情非一公在維師年久諧歸政逸辛
盤具芳郁栢酒澄嘉粟猶厭賀車煩晨門勤圭華

除夜陽口舟中

賈宗諒

一年節律令還盡猶向天涯寄客舟
平舍簫竽喧竹塢
漁家燈火傍沙洲
殷勤共敬新桃梗
棄廢堪嗟舊曆頭
守歲通宵欲無寐
煎茶幾啜綠甌

除夜

宗祁

嚴城沉夜景殘歷極年華
遶箭迎春漏稱觴待早衙
衆

歡讎順俗孤睡夢縈家侍吏持官燭供飴欲膠牙

除夜呈抑之

白子儀

逸景運寒燠良辰徒送迎冬權訖昏暮歲篇改黎明華
髮任踈颯宿心無變更唯憑一樽酒時得慰勞生

和除夜

崔正言

黎明即新歲何惜夜厭厭臘酒暖留客曉燈殘隔簾聽
音知變律望斗記寅占待得清風動日長宮線添

除夜宿黃沙館書懷

張少愚

窮年撫劍獨無眠
世路危疑倦往還
夜半無人殘月白
孤鳴梟嘯滿空山

歲窮雨夜獨卧山齋

歲晏雲深誰與遊
崑房終夜雨如秋
不知海上三山夢
何似人間萬戶侯

除日萬州臨江亭

趙崇蟠

南浦逢除日
天涯有去舟
蠻城和雨閉
峽水帶春流
不負新年感
唯多故國愁
寧無賀親酒
徒此事羈囚

除夜病中懷古


風流罪過不須文，甘抱沉痾為若人。
酒力入腸偏感興，花光搔目自傷春。
沈郎多病愁銷骨，宋玉新詞詠切鄰。
自古多情皆不免，不才何幸繼芳塵。

除夜書懷

病體盈盤厭自親，矮童烹藥過除陳。
蔗簍今夜啼三匝，齒髮明朝滿四旬。
舉足便侵知命境，空拳已失少年身。
絲毫世事無如意，例作新添一歲人。

除夜

爆竹驚山鬼呼鴉唱簾箕巷歌喧鼓面野舞祝蠶絲少
壯殘更夢矜褫曉鏡髭明朝恐添歲沉醉免聞知



歲時雜詠卷四十二

欽定四庫全書

集部

歲時雜詠卷四十三

詳校官庶吉士臣柳邁祖

助教臣常循履勘

總校官中書臣朱鈐

校對官典簿臣郭祚熾

謄錄監生臣葉世華

謄錄監生臣李璜

欽定四庫全書

歲時雜詠卷四十三

宋 蒲積中 編

正月

正月三日歸溪上有作簡院內諸公

杜甫

野外堂依竹籬邊水向城蟻浮仍臘味鷗泛已春聲藥
許鄰人劬書從稚子擎白頭趨幕府深覺負平生

正月三日閒行

白居易

黃鸝巷口鶯欲語烏鵲河頭冰欲銷

黃鸝坊名
烏鵲河名

綠浪東

西南北水紅欄三百九十橋

蘇之官
橋大數

鴛鴦蕩漾雙雙翅

楊柳交加萬萬條借問春風來早晚祇從今日到明朝

遊斜川作

并序

辛酉歲正月五日天氣澄穆風物閑美與二三鄰曲

同遊斜川臨長流望層城魴鯉躍鱗於將夕水鷗乘

和以翻飛彼南阜者名實舊矣不復乃為咨嗟若夫

層城旁無依接獨秀中阜遙想靈山有愛喜

一作
嘉名

欣對不足率爾共賦詩悲日月之遂往悼吾年之不留各疏年紀以記其時

開歲脩五十吾生行歸休念之動中懷及晨為茲遊氣
和天維澄班坐依遠流弱湍馳文魴閒谷矯鳴鷗迴澤
散遊目緬然睇層丘雖微九重秀顧瞻無匹儔提壺接
賓客引滿更獻酬未知從此去當復如意不中觴縱遙
情忘彼千載憂且極今日樂明日非所求

正月臨朝

唐太宗

條風開獻節
灰律動初陽
百蠻奉遐班
萬國朝未央
雖無舜禹跡
幸欣天地康
車軌同八表
書文混四方
赫奕儼冠蓋
紛綸盛服章
羽旄飛馳道
鐘鼓震岩廊
組練輝霞色
霜戟照朝光
宸宵懷至理
終愧撫遐荒

正月早朝

司空圖

白日新年好
青春上國多
街平雙闕近
塵起五雲和

正月五日大雪晴有感

張耒

平生對雪須千首
何事今春無片詞
老大怯寒惟泥酒

窮愁須醉不吟詩，潤催庭柳將開眼。
冷送江梅欲別枝。
何處高樓有殘白，舊游無處寄相思。

舍在京師有詩云
認得君家屋上雲

正月六日

楊柳稍青臘雪銷，東風猶帶曉寒驕。
新年時節花傳信，去臘星霜斗轉杓。
來共春烟晴冉冉，灑隨疎雨淚蕭蕭。
蛾眉不廢年華改，縱有遺魂不可招。

正月六日雪霽

曾鞏

雪消山水見精神，滿目東風送早春。
明日杏園應爛熳，

便須期約看花人

正月八日招王子高晚飲

蘇軾

雪屋號風苦戰貧，紙窗迎日稍知春。
正如簷蔔林中坐，更對芙蓉城裏人。
昨想玉堂空冷徹，誰分銀榼送清醇。
海山知有東南角，正看歸鴻作小顰。

正月八日早寒

張耒

濃淡春雲夜雨乾，寂寥庭院裊衣寒。
無人為發樽前笑，但把梅花似舊看。

正月十日五更夢中

梅堯臣

去年人比今年老今年花似去年新我勸厚地一盃酒
收拾白日莫苦辛

正月十日雪晴

張耒

西窗融雪飄如雨故與新春作薄寒昨夜鴈聲渾向北
夢魂隨去過關山

正月十八日觀田家春作

梅堯臣

田家春作日日近丹杏破顏場圃頭南嶺禽過北嶺叫

高田水入低田流桑牙將綻霧露裛蠶子未浴相篚收
今我還朝固不遠紫宸已夢瞻珠旒

正月二十日與潘郭二生出郊尋春

蘇軾

亂山環合水侵門身在淮南盡處村五畝漸成終老計
九重新掃舊巢痕豈惟見慣沙鷗熟已覺來多釣石溫
長與東風約今日暗香先返玉梅魂

六年正月二十日復出東都仍用前韻

東風未肯入東門走馬還尋去歲村人似秋鴻來有信
事如春夢了無痕江城白酒三盃釀野老蒼顏一笑溫
已約年年為此會故人不用賦招魂

正月二十一日病後醉述古邀往城外尋春

屋上山禽苦喚人檻前水沼忽生鱗老來厭逐紅裙醉
病起空驚白髮新卧聽使君鳴鼓角試呼稚子整冠巾
曲欄幽榭終寒窘一看郊原浩蕩春

正月二十一日雪中赴宿懷鄰幾原甫

梅堯臣

正月東都雪多於舊臘時酒賓臨迴閣野雀集枯枝馬
向西城度花從上苑遲劉郎與江叟相對定爭棋

正月二十五日小疾在告是日苦寒

三首

張耒

黃草岡頭薺麥長春陰蔽日午風狂山前梅落無人見
只有幽禽啼暗香

春色三分有尚多且饒芳草占高坡門前柳色如彭澤

爭奈陶君止酒何

時余方
病止酒

見說櫻桃已爛開
坐愁風雨苦相催
自憐華髮傷春色
兩見飛花未放回

閏正月二十五日送客尋春集裴氏園

宋 祁

尋春選客共畱連
雨罷春郊物物妍
黃抹柳梢初徧後
紫粘花萼未開前
朋衿自為交驩慘
醉筇誰能辨聖賢
猶賴斜陽催跋馬
不然離恨損絲絃

正月二十六日同子華相公遊王太尉園

司馬光

聞說名園乘興來小桃繁艷間寒梅主人千里司宮鑰
寂寞殘英委綠苔

二月

二月一日作贈韋七庶子 白居易

杏園紅萼坼庭蘭紫華出不覺春已深今朝二月一去
冬病瘡痛將養遵醫術今春入道場清淨依僧律嘗聞

聖賢語所慎齊與疾遂使愛酒人停盃一百日明朝二
月二疾平齋復畢應須挈一壺尋花覓韋七

二月五日花下作

二月五日花如雪五十二人頭似霜聞有酒時須笑樂
不關身事莫思量義和趣日沉西海鬼伯驅人葬北邙
祇有且來花下醉從人笑道老顛狂

慈恩寺二月半寓言一首

五言

杜甫

二月韶春半三空霽景初獻來應有受

一作壽

滅盡竟無

餘花迹傳官寺歸誠謁梵居殿堂花覆席觀閣柳隨疏
共命枝間鳥長生水上魚問津窺法鏡迷路得真車行
密樂關靜談精俗態祛稻麻欣所遇蓬擇搶焉如不駐
秦京陌還題蜀郡興愛離方自此迴望獨躊躇

二月十五日櫻桃盛開自所居躡履吟翫競名

王澤章洋才

溫庭筠

曉覺籠烟重春深染雪輕靜應留得蝶繁欲不勝鶯影
亂晨飈急香多夜雨晴似將千萬恨西北為卿卿

二月二十二日撫州如歸館雨中有懷簡諸朝

客

韓偓

悽悽惻惻又微嚔欲話羈遊憶故人薄酒旋醒寒徹夜
好花虛謝雨歲春自憐海上為逋客猶喜天涯寄侍臣
未必交情繫貧富蓬門自古少車塵

二月二十八日贈周判官

一春惆悵殘三日醉問周郎憶得無柳絮送人鶯勸酒
去年今日到東都

二月晦留別鄆中友人

賈島

立馬柳花裏別君當酒酣
春風漸向北雲鴈不飛南
明曉日初一今年月又三
鞭羸去暮色遠岳起烟嵐

二月奉教作

李嶠

柳陌鶯初轉梅梁燕始歸
和風泛紫茗柔露濯青薇
日艷臨花影霞翻入浪暉
乘春重遊豫淹賞翫芳菲

二月樂遊詩

郭元振

二月芳遊始開軒望晚池
綠蘭日吐葉紅藥向盈枝
柳

色行將改君心幸莫移陽春遽多意唯願兩人知

二月閨怨

二月韶光好春風香氣多園中花巧笑村

一作樹

裏鳥能

歌有恨離琴瑟無情着綺羅更聽春燕語妾亦不知他

憶長安十二詠

鮑防

憶長安二月時玄鳥初至祿祠百囀宮鶯繡羽千條御
柳黃絲更有曲江勝地此來寒食佳期

狀江南十二月每句須一物形狀

謝良輔

江南仲春天細雨色如烟絲為武昌柳布作石門泉

柳州二月榕葉落盡偶題

柳宗元

官情羈思共悽悽春半如秋意轉迷山城過雨百花盡
榕葉滿庭鶯亂啼

河南府試二月樂辭

李賀

飲酒採桑津宜男草生蘭笑人浦如交劍風如薰勞勞
胡鶯一作燕怨酣春薇帳逗烟生綠塵金翅蛾髻愁暮雲

笛颯起舞真珠裙
津頭送別唱流水
酒客背寒南去一作
山死

仲春賞花

韋同則

梅花似雪柳含烟
南地風光臘月前
挹酒且須判却醉
風流何必待歌筵

二月

二月一日作

柳蔭簷陰夾隱堂
徙屏開戶納溪光
香風帶月吹吟帳

野色和雲逼卧牀芳草不窮愁眼斷落花無定夢魂忙
黃庭却老非無術祇為多情染鬢霜

二月二日會於廬陵西齋作寄陳適用

黃庭堅

燕寢著爐香悒悒閒窗闌夢到郡城東談笑西齋月行
樂未遽央苦遭晴鳩聒江郡梅李白士女嬉城闕聞道
潘河陽滿城花秀發頗留載酒車共醉生塵襪想見舞
餘姿風枝斜蠆髮鄙夫不舉酒春事亦可悅兩足肥茵

芝沙暄饒笋蕨海半壓風簾野飯薰僧鉢飽食愧公家
曾無助毫末勸鹽惟新尹王政惇獨活此邦談食僉僉
陋深刺骨公困積山丘賈豎但主撮縣官恩乳哺下吏
用鞭撻政恐利一源未塞兔三窟寄聲賢令尹何道補
黥則從來無斫桑顧影愧一作思簪笏何須殿課上解綬
行采葛

二月二日挑菜節大雨

張耒

久將松芥荆南美佳節泥深人未行想見故園蔬甲好

一畦春雨轆轤聲

正月久旱二月三日大雨

沈 邁

神潢敲日泮凝澌一夜盆傾綠野脂二月震雷差似早
三農愆雨已驚遲柳疎零露鶯衿濕花怯餘寒蝶夢知
風物只消縑數幅恨無高藝似王維

二月四日雪

梅堯臣

前日春風初擺條昨夜雪飛深一尺北帝及臘不行令
東皇發煦遭爾厄侵時奪氣四時錯欲問上天何不責

天高地厚語難通
俛首下土徒叩額
或言莫信難可難
鶴鳴至微猶不隔
休問天問顏跼休
看花看龍麥

二月五日雪

二月狂風雪寒威
曉更加省闈輕妬
粉苑樹暗添花有
夢皆蝴蝶縫袍只
紵麻凍吟誰料我
相與賭流霞

二月五日折梅時值雨謝矣 張耒

江雲靄靄未全開
東嶺微茫日色來
獨犯輕寒踏春曉
殷勤更折雨中梅

二月七日欲招客飲而風霾不果有作

欲攜佳客宴高堂園館春風又作狂樽挾水霜餘意氣
座分桃李好風光青山無賴藏雲岫綠水生波灑野塘
不飲何妨閒燕坐閉門掃地獨焚香

二月九日感李花

梅堯臣

重門雖鎖春風入先折桃花後李花赤白鬪妍思舊曲
舊聲傳在五王家五王不見畱華萼華萼壞來碑缺落
當時李白欲騎鯨醉向江南曾不錯

二月十四日夜霜

欣欣東園杏忽值春飛霜粲然彼繁英萎若出沸湯既能與之榮而復使之傷向來肅殺時已共百卉黃今日草吐心不似草心長天理固難測誰要必其常

二月十五日雪 三首

寒令奪春令六花侵百花塘冰膠燕嘴野水澌片茅擁柱輕如絮吹墀淨若沙乳禽飢啄木誰誤撥琵琶

新雷奮蛇甲密雪鬪鵝毛正欲裁輕縠重令着敝袍沙

泉流復凍烟萼折還韜只待鄰醅熟微聲聽酒糟
春風九十日一半已銷磨準擬看花少依稀詠雪多官
車猶載炭抱鵲不離窠向此興都盡戴家誰復過

二月十五日

張耒

春風揚塵春日白衡門向城人寂寂淮陽三月桃李時
街頭時有賣花兒老人卧穩起常晚欲強出游心獨懶
一樽美酒酬芳菲老大不及少年時

二月二十一日東園桃李未開有感

二首

日慘東風正怒號小園寂寂閉蓬蒿可悲春色如人事
獨發玄都觀裏桃

寄語玄都觀裏花饒君繁麗奪朝霞劉郎想到長安日
葵麥風前一嘆嗟

二月二十四日館宿興宗舍後桃花盛開偶書

牖上

司馬光

金馬春寂寂濃桃隨意開夕風零落盡不待主人來

二月三十日與同舍宴李氏園晚歸馬上賦詩

門前蹀躞金羈滿坐上連翩玉笋飛數尺遊絲留客醉
一行春柳送人歸同邀勝友時難得重到名園花已稀
莫惜芳辰驢行樂無端風雨橫相違

三月

三月五日陪裴大夫泛東湖 呂溫

上已餘風景芳辰集遠坰綵舟浮泛蕩繡轂下娉婷樓
樹迴蔥蒨笙歌轉杳冥湖光迷翡翠草色醉蜻蜓鳥弄
桐花日魚翻穀雨萍從今留勝會誰看畫蘭亭

三月十日流盃亭

李商隱

身屬中軍少得歸，木蘭花盡失春期。
偷隨柳絮到城外，行過水西聞子規。

三月十八日雪中作

溫庭筠

芍藥薔薇語早梅，不知誰是艷陽才。
今朝領得春風意，不復饒君雪裏開。

嘲三月十八日雪

三月雪連夜未應，傷物華只緣春。
欲盡畱着伴梨花。

三月十八日詔宴樂遊園 張說

樂遊形勝地表裏望郊宮北闕連天頂南山對掌中皇
恩賦芳月旬宴美成功魚戲芙蓉水鶯啼楊柳風春花
看欲暮天澤戀無窮長袖招斜日流光待曲終

三月二十四日宿曾峯館對花寄樂天

元稹

微月照桐花月微花漠漠怨澹不勝情低徊拂簾幕葉
新陰影細露重枝條弱夜立春恨多風清暗香薄是夕

遠思君思君瘦如削但感事睽違非言官好惡奏書金
鑾殿步履青龍閣我在山館中滿地桐花落

郡齋三月下旬作

張又新

春事日已歇池塘曠幽尋殘紅被獨墜初綠間淺深偃
仰倦芳褥顧愛步新陰謀春未及竟夏物遽見侵

三月奉教作

李嶠

銀井梧桐發金堂草色齊韶光愛日宇淑氣滿風蹊蝶
影將花亂虹文向水低芳春隨意晚佳賞日無睽

三月閨怨

杜甫

三春時將盡空房妾獨居蛾眉愁自結鬢髮沒情梳

憶長安十二詠

杜奕

憶長安三月時上苑遍是花枝青門幾場送客曲水竟
日題詩駿馬金鞍無數良辰美景追隨

狀江南十二月每句須一物形狀

嚴維

江南季春天蓴絲細如絃湖邊草作逕湖上葉如船

河南府試三月樂辭

李賀

東方風來滿眼春花城柳暗愁幾人
複宮深殿竹風起新翠舞衿淨如水
光風轉蕙百餘里暖霧驅雲撲天地
軍裝宮妓掃蛾淺搖搖錦旗夾城暖
曲水飄香去不歸梨花落盡成秋苑

三月

辛夷才謝小桃發踏青過後寒食前
四時最好是三月一去不來惟少年
吳國望遙江接海漢陵魂斷草連天

新愁舊恨真無奈須就隣家甕底眠

閏三月

三月皆一閏此閏勝常時莫怪花開晚須憐春盡遲
節分炎氣進律應暖風移夢得成蝴蝶芳華幸不遺

三月

三月四日玩園花小集

宋祁

中園愛客重游陪三月林花落復開鏤管喜傳吟處筆
白雲催卷醉時杯歡襟已快邀風度舞地猶寬放雪回

不是年華相假借使君兼乏斐然才

三月五日欲訪宋中道遇雪而止

梅堯臣

蝴蝶飛時雪鬪輕滿街撩亂得人驚欲尋宋子東城去
馬畏春泥不敢行

三月六日馬令送花

張耒

未洗潯陽別淚痕江邊蘋芷不勝繁不知來歲在何處
又對新花憶故園挿帽每慙呼白髮飛香曾伴照青樽

去年今日淮陽道落絮殘紅正斷魂

三月八日喜雨答李都官 宋 祁

夜魄離星舍春膏浹大田乍迷榆塞樹徐暗柳營天沿
滴銀波蕩階鳴玉綆絃餘萌催離土殘魑趣沉淵迴濕
來鶯外斜寒去鴈邊莓莓滋野秀纂纂濯花妍戴響饒
農笠眠聲羨釣船罽雲時露日迷岫旋埋烟酌酒聊相
勞斯倉竚有年勞君歌閔雨予志謝先賢

春秋傳閔雨者有意於民

也

三月十二日作時董氏欲爲堂東築宅

張耒

黃鳥聲中花已盡
綠楊風外日何長
柯家山下有幽室
雲夢宅南非故鄉
老病夾衣猶怯冷
春深煮酒漸聞香
本無智術爭榮辱
只闕樽前身健強

次韻宋懋宗三月十四日到西池聞都人盛觀

蘇翰林出遊

黃庭堅

金絨繫馬曉鶯邊
不比春江上水船
人語車聲喧法曲

花光樓影倒晴天人間化鶴三千歲海上看羊十九年
還作鰲頭驚俗眼風流文物屬蘇仙

和李

一作王

廷老三月十四日

梅堯臣

三月日幾望士遊溱水陽溱流已渙渙有美此翱翔偶
乘適此願月色同滿床士曰涉少室女曰歸大梁及晨
各異役悲喜競回腸芍藥有遺風贈好期不忘固匪子
能逮是焉繼新章

次韻景彛三月十六日范景仁同飲還省宿

種桃依竹似仙家，邀對春風共泛霞。
席上未觀雙舞鳳，城頭已覺聚啼鴉。
忽忽跨馬人歸省，暮暮生烟樹飲花。
稚子候門知我醉，東方明月照扉斜。

三月二十日開園

三首

霜髯雪鬢語僖寧，蕩澹園林取次行。
要識將軍不凡處，從來只啜小人羹。

西園壯籥夜沉沉，尚有遊人卧柳陰。
鶴睡覺時風露下，落花飛絮滿衣襟。

鬱鬱蒼顏真道人絲絲紅萼是鄉人何時翠竹江村路
送我柴門月色新

三月二十四日聞鶯記臨汝時

張耒

桃溪李徑有埃塵寂寂春陰蔽四隣落月半床幽夢斷
隔窗芳樹語鶯新忽忘身是三年客便覺樓瞻二室雲
佳境故人應一夢懶將白髮望餘春

三月二十五日聞鳴鳩

雲夢澤南春欲還
柯山鳴鳩曉關關
幽人夢覺殷勤聽
落月西風尚薄寒

三月二十七日邀子駿堯夫賞花

司馬光

今年節物非常晚
春盡西街花尚多
試問二三真率友
小車籃舁肯重過

三月二十八日會不疑家席上紀實

名客客俱來賞花
花正開寒暄方得
所風雨不相催席

上柳飛雪門前車隱雷主人意仍厚安得不徘徊

三月二十九日

二首

蘇軾

南嶺過雲看紫翠北江飛雨送淒涼酒醒夢回春盡日
閉門隱几坐燒香

門外桃花猶的爛牆頭荔子已爛斑樹暗草深人靜處
捲簾歌枕卧看山

歲時雜詠卷第四十三